

কাজী জহিরুল ইসলাম এক বিশ্ববিচরণশীল কবিমানুষ

আল মাহমুদ



আমার বিবেচনায় বর্তমান সময়টা হলো দেশ থেকে নানা কারণে ছড়িয়ে পড়া প্রবাসী লেখকদের লেখার সময়। এরা বাংলা ভাষার আশাজাগানিয়া সাম্প্রতিক লেখকগোষ্ঠী। এদের মধ্যে কবির সংখ্যাই অধিক। আমার জানামতে আমাদের কয়েকজন শ্রেষ্ঠ লেখক দেশের বাইরেই অবস্থান করছেন। তাদের মধ্যে আমার বন্ধু শহীদ কাদরী নিস্ক্রীয় হলেও সাহিত্যগতপ্রাণ। নাম উল্লেখ করতে গেলে অনেকের নামই বলা যায়। কিন্তু যেহেতু আমি ভেবেছি আমি এমন একজন লেখকের ওপর লিখবো যার কবিতা, প্রবন্ধ, ভ্রমণবৃত্তান্ত, আন্তর্জাতিক চাকুরী সব মিলিয়ে একটা মোহ সৃষ্টিকারী মানুষ। তার সাথে আমার ঘনিষ্ঠতা সৃষ্টি হয়েছে এটা তার কোন উপকারে লাগবে কি-না আমি জানি না কিন্তু আমি নিজেকে তার দ্বারা উপকৃত মনে করি। এর আগেও আমি তার ওপর লিখতে চেষ্টা করেছি। তার নাম কাজী জহিরুল ইসলাম। তিনি জাতিসংঘের একটি ভ্রাম্যমান পদে অধিষ্ঠিত আছেন। তার বর্তমান আবাস আইভরিকোস্টের আবিদজান শহরে। জায়গাটা সম্মুখে আমার কোন ধারণা ছিল না। কবি জহিরুল ইসলাম আমাকে সেই ধারণা দিয়েছেন।

বাইবেলে (ওল্ড টেস্টামেন্ট) সিটিম কাঠের কথা উল্লেখ আছে। আমরা এখন যে কাঠকে এবনি কাঠ বলে উল্লেখ করি, খুব সম্ভব এটাই অতীতের সেই সিটিম কাঠ। সেই সিটিম কাঠের স্বর্ণখ্যাত পশ্চিম আফ্রিকায় অবস্থানকারী এই সময়ের গুরুত্বপূর্ণ বাঙালী কবি কাজী জহিরের আলোচনা করতে গিয়ে আমাকে দুটি বিষয় সামনে রেখে এগুতে হবে। এক হলো তার আন্তর্জাতিক অভিজ্ঞতা ও জাতিসংঘের চাকুরী আর দুই হলো জহিরের কবিতা। শুধুই কবিতা আর কিছু নয়। আমার দৃঢ় ধারণা জহির যদি কবি না হতেন তাহলে তার পক্ষে সে যে জাতিসংঘের গুরুত্বপূর্ণ দায়িত্বে নিয়োজিত সেটা শেষ পর্যন্ত ধরে রাখতে পারতেন না। হয় কবিতা জহিরকে বাঁচিয়েছে কিংবা বলা যায় মানুষের মধ্যে যে কবিতার উৎসমূল স্বপ্নে, জাগরণে উৎসারিত থাকে সেটাই জহিরকে বাঁচিয়েছে। আমি বহু প্রবাসী লেখকের সাথে সম্পর্কিত। মাতৃভূমির সাথে যোগাযোগ রাখার যে ব্যকুলতা সেটা কবি না হলে সম্ভবপর হয় না। জহিরকে আমি ভালোবাসি। তার হাতে যে কবিতা খুলছে সেটা বাংলাভাষার সর্বশেষ আধুনিক স্তর। এই স্তর পুরোটাই সৃষ্টি করেছেন প্রবাসী কবিকুল। শামসুর রাহমানের মৃত্যুর পর আমার বিবেচনায় আমাদের কবিতার মৌলিক সূত্রগুলো ক্রমাগত বাইরে সরে যাচ্ছে। না তা ঢাকায় বসতি করতে পারছে, না কোলকাতায়। আমরা কি করতে পারি যদি নিউইয়র্কে, প্যারিসে, লন্ডনে কিংবা জহির যেখানে থাকে সেই আইভরিকোস্টে পরিপুষ্ট হয়ে ওঠে বাংলা কবিতা? বাংলা কবিতার দেশজতা নিয়ে অহঙ্কার করে কোন লাভ নেই। কারণ আমার জীবনকালেই আমি বাংলা ভাষার শ্রেষ্ঠ কবিতারূপকে প্রবাসে দেখতে পাচ্ছি।

অমিয় চক্রবর্তী যেখানেই থাকুন সবসময় দেশের দিকে তাকিয়ে থাকতেন। দেশে তার একটি কবিতা তার বন্ধু বুদ্ধদেব বসু ছেপে বের করে দিলে তিনি ভারি খুশী হতেন। বলতেন, মেলাবেন তিনি মেলাবেন... পুরো বাড়িটার এই ভাঙা দরোজাটার... কিন্তু প্রকৃত মেলানোর কাজটা এখন সাধিত হচ্ছে অত্যন্ত রহস্যজনক নিয়মের মধ্যে প্রবাসে। কবিত্ব শক্তির সবগুলো লক্ষণ নিয়ে এই কবি, আমার বন্ধু, কাজী জহিরুল ইসলাম কয়েকদিনের জন্য আইভরিকোস্ট থেকে ঢাকায় এসে নিঃশ্বাস ফেলছেন। যেন হাফ ছেড়ে বাঁচা কিংবা ভাবটা এমন, দেখুন না

মাহমুদ ভাই, আমি ঢাকায় এসেছি। এই যে ভ্রমণবিলাসী বিচরণশীল কবিত্বশক্তি, এটাই হলো আমার কালের বা বয়সের একেবারে শেষদিকের বিবর্তন।

ঢাকায় কেউ লিখতে পারছে না, এজন্য বাংলা কবিতাতো আর হাত গুটিয়ে বসে নেই। লেখা হচ্ছে আইভরিকোস্টে, লন্ডনে, প্যারিসে, নিউইয়র্কে। কেউ কারো জন্য অপেক্ষা করছে না। তারা নিজের ভাষাকে দিগ্বিজয়ী করে চলেছেন, এজন্য আমার মতো বৃদ্ধের কি তাদের কাছে কৃতজ্ঞ থাকা উচিত নয়?

জহিরের কবিতা আমার ভালো লাগে একথা আমি আগেও বলতে চেয়েছি। শুধু বলিনি, তার ওপর প্রবন্ধ লিখে তা আমার প্রবন্ধের বই ‘কবির সৃজন বেদন’-এ অন্তর্ভুক্ত করেছি। কাজী জহির বাংলা ভাষার সবচেয়ে সমৃদ্ধ প্রবাসী কবিত্বশক্তি। তার কবিতা তারুণ্যকে পথ দেখায় এবং আমার মতো বৃদ্ধকে বিস্মিত করে। আমি অবশ্য আমার সাম্প্রতিক চিন্তায় চিত্রকল্পকেই কবিতা বলে কিংবা কবিতার প্রধান কাজ বলে ঘোষণা করেছি। কেউ কেউ এর জন্য আমাকে একটু খোঁটাও দিতে চেষ্টা করেছেন। বলেছেন অন্ধের এ ছাড়া উপায় কি? আমি বাংলা কবিতার স্বার্থে এই খোঁটা হজম করে নিতে চাই। একই সাথে কাজী জহিরের চিত্রকল্পের অভিনবত্ব নিয়ে আমার বিস্ময়বোধ কবিতা প্রেমিকদের জানাতে চাই।

এবার জহিরের সাথে আমার বিস্তারিত সাহিত্য আলোচনা সম্ভব হয়নি। সে হঠাৎ ঢাকায় এসে সম্ভবত তার পরিবার পরিজন নিয়ে ব্যস্ততার মধ্যে সময় কাটিয়েছে। তবু মোটুকু কথাবার্তা হয়েছে, তাতে আমার উপলব্ধি হয়েছে যে এই বিচরণশীল কবি প্রতিভা মুহূর্তের জন্য থেমে নেই। সে ক্রমাগত পৃথিবীর আলোকোজ্জ্বল শহর থেকে ছিটকে বেরিয়ে গিয়ে আইভরিকোস্টের দায়িত্বজ্ঞানসম্পন্ন চাকুরীর অবকাশে তৈরী করছে চিত্রকল্প।

‘ভোরবেলা অরেঞ্জ টিপে বের করি সকাল/ফ্রিজটা হা করে শ্বাস ছাড়ে, শীতল প্রবাস/স্পিনাচের কাছে দুপুরটা জমা রেখে বের হই/উইকডে’র গিয়ার বদলাই অভ্যাসের হাতে/ড্যাশবোর্ডে তিনটা ডেডলাইন, দুইটা মিটিং/গোটা পাঁচেক রিপোর্ট/ ভালোই কাটছে আবিদজানা’ (হঠাৎ কবিতা-৭, কাব্যগ্রন্থ: দ্বিতীয়বার অন্ধ হওয়ার আগে।)

‘এখনতো আকাশের স্ট্রীটে হাঁটে ডিজিটাল নারদ/ইথারের অভেনে সেক্স হয় বাতাসের ডিম/রাত্রির বাগানে ফোটে ছোট ছোট দীর্ঘশ্বাস/অন্ধকারের ফরাশ বিছিয়ে বসেন ই-পীর/রাপোর তাবিজে আবেগের মোম লাগান সারারাত/দুধভরা ওলান ঝুলিয়ে হাঁটে বরফের গাই/মুখ দেয় সেলুলার ঘাসে/কষ্টের টুথব্রাশে দাঁত মেজে স্নেহের ঝাপটা দিই চোখে-মুখে/সারাদিন পার করি স্বপ্নের জামায় বোতাম লাগাতে লাগাতে’ (আকাশের স্ট্রীটে হাঁটে ডিজিটাল নারদ, কাব্যগ্রন্থ: আকাশের স্ট্রীটে হাঁটে ডিজিটাল নারদ)

আসলে এটা কি কবিতা? এটা কি প্রকৃতিবর্ণনা? নাকি এক কবির অন্তর নিংড়ে নেয়া একটি পৃথিবীর চিত্র, যা এ সময়ের হয়েও চিরকালের। এই কবিতা বিচারের জন্য বাংলাদেশে সম্ভবত এই মুহূর্তে আমি ছাড়া কেউ নেই। হয়তোবা বাংলা ভাষায়ই আর কেউ নেই। আমি এই বিচরণশীল বাঙালী কবি কাজী জহিরুল ইসলামকে তার কাজ পরিশ্রমের সাথে ও অন্তর্দৃষ্টির উপলব্ধি মিশিয়ে আরো বিস্মৃত করতে অনুরোধ করি। মনে রাখতে হবে কবিকে উপদেশ দেওয়া অনুচিত কাজ। এজন্য অনুরোধ শব্দটি সাহসের সাথে ব্যবহার করলাম।

আমার আনন্দ হলো আমাদের দেশের তারুণ্য যেমন কেবল নারী শরীরের মধ্যেই সমস্ত বিস্ময় জমা করে নিজের চারিদিকে দেয়াল তুলে দিয়েছে কাজী জহির তা করেন নি। তার মৌলিক দৃষ্টিভঙ্গি হলো এই পৃথিবী। পৃথিবীর জন্য কাজ করা এবং কবিতা লেখা এই দুটোই এক সঙ্গে কাজী জহির করে চলেছেন। তিনি কোথায় পৌঁছবেন তা আমার মতো বৃদ্ধের পক্ষে আন্দাজ করা সম্ভব নয়। তাছাড়া আমি ভবিষ্যত বক্তাও নই। তবে যেখানে ঢাকায় বসে তরুণদের কবিতা পাঠ করে আশা-নিরাশার এক অনিশ্চিত অবস্থায় কাল কাটাচ্ছিলাম সেখানে কাজী জহিরুল ইসলাম মুহূর্তের মধ্যেই আমাকে জানিয়ে দিলেন কবিতা কোন পারদর্শিতার ব্যাপার নয়

। এর জন্য জন্ম থেকেই কিছু একটা স্বপ্ন নিয়ে জন্মতে হয় । জহিরের স্বপ্ন শেষরাতের, ভোরের স্বপ্নের মতো সদ্যস্বপ্ন । পৃথিবীর প্রতি গভীর মমতা না থাকলে কাজী জহিরের সাম্প্রতিক কবিতার মতো কোন কিছু রচনা করা যায় না । একসময় আমি বলতাম, একজন কবির একটা দেশ থাকতে হবে । কিন্তু জহির আমাকে বুঝিয়ে দিল যে একজন কবির যদি দেশ শেষ পর্যন্ত না-ই থাকে তাহলে সে শুধু কবিতার মধ্যেই বাঁচতে পারে । আমি কাজী জহিরের এই বাঁচাকে সার্থক বাঁচা বলে বিবেচনা করি ।

বাংলাদেশের অসংখ্য শ্রমজীবী মানুষ সারা পৃথিবীতে ছড়িয়ে পড়েছে । তারা যোগ করছে বাংলা ভাষায় নতুন কলরব । নতুন শব্দ । এবং এইসব শব্দ ও কলধ্বনি আমাদের কবির দেশে থেকে কবিতায় নিষিক্ত করতে পারছেন না । কিন্তু কাজী জহিরুল ইসলাম চিরনির্বাসিত কবি ব্যক্তিত্ব । তার দ্বারাই সম্ভব পৃথিবীর শ্রমবিনিময়ের ভাষা সঠিকভাবে অনুভব করে তার ভেতরকার মূল্যবান শব্দরাজী নিজের কবিতার অন্তরে সংযোজন করা । আমি এটাকে জহিরুল ইসলামের সৌভাগ্যের সূচক বলে ধারণা করি । আজ থেকে ৫০ বছর পরে বাঙালী কবিকুল কি ধরণের কবিতা সৃষ্টি করবেন তা হয়ত এই মুহূর্তে আন্দাজ করা আমার সাধ্যের বাইরে কিন্তু কাজী জহিরুল ইসলামের মতো বিশ্ব আবর্তনকারী কবি সেটাও হয়ত আন্দাজ করতে পারেন । আর আমরা পারি অপেক্ষা করতে।

ত্রিশের দশকের কবির পশ্চিমের কয়েকটি জানালামাত্র আমাদের কাছে উন্মুক্ত করে দিয়েছিলেন । কিন্তু সামগ্রীক অর্থে পশ্চিমকে হৃদয়ে ধারণ করার মতো কোন বড় কাজ তারা করতে এগুনি । এ কথাটা কাজী জহিরুল ইসলামদের মনে রাখা উচিত বলে মনে করি । কবি যদি অনেক কিছু দেখেন তবে তা কয়েকটি চিত্রকল্প এবং শব্দে ইঙ্গিতময়ভাবে তার পাঠকদের জানিয়ে দেওয়া খুব দুরূহ কাজ নয় । সমস্ত দেখার অভিজ্ঞতাকে নিজের জাতির মধ্যে সঞ্চার করতে হলে কাজী জহিরুল ইসলামদের ভেবে দেখতে হবে সেটার পদ্ধতি কি হওয়া উচিত ।

জাতিসংঘের নিয়োগ পেয়ে কাজী জহিরুল ইসলাম সস্ত্রীক জাতিগত বিরোধে ক্ষতবিক্ষত যুগোন্মভিয়ার কসোভোতে অবস্থান করতে বাধ্য হয়েছিলেন । এই সময়টাকে তিনি লিখতে চেষ্টা করেছিলেন । না জেনে লেখা নয়, জেনে সত্য আবিষ্কার করার মতো দৃঢ়চিত্ত নিয়ে তিনি কবির মতো কাজ করেছেন । এই ধরণের কাজকে কবিত্বের কলমবাজবৃত্তি বলা যায় ।

‘রাখাল যুবক খোঁজে নড়ে ওঠা রোদের উৎস/স্কাটের গভীরে ফেলে শিপটর দৃষ্টি/কতো বন, নাসিসের সুবাস/কতো পাহাড়, ঝর্ণার কলকল/কতো নদী, বহমান সময় পেরিয়ে অবশেষে/ খুঁজে পায় সে রোদের উৎস/এর পরের গল্পটা খুবই কষ্টের/...../হোক না এক টুকরো/তবুতো রোদ, আগুনের সহোদর/ওকে কি লুকোনো যায়/ইলের সমাজে এ যে ঘোর অন্যায়/জাতিভেদ নেই বুঝি তোর মুখ রাখান/বুঝি ভুলে গেছিস এরি মধ্যে/কী নির্মম দাহে জল্লাদ রোদের তেজ/পুড়িয়েছে তোর স্বজাতির সন্ত্রম/আমাদের কচি ঘাস, সবুজ ফসলের মাঠ/শিপনঙ্গয়ার ডানার পালক / / সেই থেকে বলকানে আগুন, যুদ্ধ ও রক্তের খেলা/ঘরে ঘরে প্রেম ও ঘণার যুদ্ধ/যুদ্ধ ভাষা ও শব্দের/যুদ্ধ মসজিদ ও গীর্জার/ যুদ্ধ সন্ত্রম ও মর্যাদার/দখলের যুদ্ধ, যুদ্ধ বাঁচা-মরার, প্রেম ও ভালোবাসার/যুদ্ধ এখন তাহাদের জীবনের অনুযঙ্গ/সবচেয়ে নিকট আত্মীয়া’ (লাল স্মার্ট, কাব্যগ্রন্থ: পাঁচতলা বাড়ির সিঁড়িপথ)

তিনি আবিষ্কার করেছেন, দেখেছেন এবং লিখেছেন যা বাংলা কবিতায় স্বাভাবিকভাবে নতুন অভিজ্ঞতা । কবি যে পরিবেশে থাকেন সেখানেই শব্দচিন্তা তাকে লেখার প্রেরণা যোগায় । কাজী জহিরুল ইসলাম এই প্রেরণায় দীর্ঘকাল পর্যন্ত উদ্বুদ্ধ ছিলেন । কাজী জহিরুল ইসলামের কবিমানস আমাদের দেশের সাধারণ পাঠকদের কাছে অচেনা আগন্তুকের মতো । সৌন্দর্যের ঘাত-প্রতিঘাতে ক্ষত-বিক্ষত হৃদয়কে আমরা কবিহৃদয় বলি । আমি সৌন্দর্য বলতে মানুষের সুন্দরের ধারণাকেই বোঝাতে চাই । কবি জহিরুল ইসলাম তার বিচরণবাদী কবিতায় আমাদের কাব্যধারণাকে ঈষৎ পরিবর্তিত করে দিন এটা আমার কাম্য এবং একই সাথে প্রশংসারও কারণ ।

অগ্রজ কবিরা কাউকেই প্রশংসা করেননি এই দুর্নাম নিয়ে অনেক বড় কবি আমাদের পরিবেশ থেকে অন্তর্হিত হয়ে গেছেন। আমি এই ভুল করতে চাই না। সাহিত্যে কৃপণতার চেয়ে বড় পাপ আর কিছু নেই। যোগ্যকে, প্রতিভাবানকে প্রশংসা বা স্বীকৃতি না দেওয়ার চেয়ে কপোন স্বভাব আর কিছু হতে পারে না।

আমি কাজী জহিরুল ইসলামের চির ভ্রাম্যমান কবি স্বভাবের প্রশংসা করি। একজন কবি কি করতে পারেন যদি তিনি তার জীবনের মূল্যবান সময় দেশে বিদেশে পেশাগত কারণে অবস্থান করতে বাধ্যবাধকতার মধ্যে থাকেন? কাজী জহিরুল ইসলাম কবিতা লিখে তার নিজের দেশের সাথে একটা সংযোগ স্থাপনের নিরন্তর প্রয়াশ চালিয়ে যাচ্ছেন। আমি এই প্রয়াশের মূল্য দিতে চাই।

বাংলা কবিতার একটা অংশ প্রবাসী কবিদের হাতে স্ফূর্তি পাচ্ছে। এটাকে আধুনিক কবিতার সৌভাগ্যই বলতে হবে। মাঝে মাঝে কাজী জহিরুল ইসলাম দেশে ফিরে এলে তিনি তার কবিতার ভান্ডার আমাকে উজাড় করে শোনান। আমি লক্ষ্য করেছি তার কবিতায় কোন ধার করা বিষয় নেই। তিনি যেসব দেশে ভ্রাম্যমান অবস্থায় থাকেন সেসব দেশের নিসর্গচিত্র, মানুষ এবং সামাজিক অবস্থার বর্ণনা দেওয়ার চেষ্টা করেন। এটা আমাকে মুগ্ধ করে। কাজী জহিরুলের শক্তি হলো তার ভাষাকে সব কিছু বর্ণনা করার মতো করে গড়ে তুলতে চেয়েছেন। সম্প্রতি তিনি তার কিছু কবিতা আমাকে পাঠ করে শুনিয়েছেন যা চিন্তার দিক দিয়ে এক আন্তর্জাতিক পরিকল্পনার প্রাপ্ত হুঁয়ে খেই খুঁজে ফিরেছে। এই ধরনের কবিতা আমাদের তরুণ কবিদের পক্ষে লেখা সম্ভবপর নয়, কারণ চির ভ্রমণশীল জীবন সম্মুখে তারা অবহিত নন। কাজী জহিরুল ইসলাম বর্তমানে আফ্রিকার আইভরিকোস্টে জাতিসংঘের একজন আন্তর্জাতিক কর্মকর্তা হিসাবে দায়িত্ব পালন করছেন। চেষ্টা করছেন যেখানে আছেন সেখানকার মানুষজনের এবং প্রকৃতির সঙ্গে একটা সম্মিলন তৈরী করতে। এই তৈরী করার আগ্রহটা প্রকৃতপক্ষে কাজী জহিরুলের কবিতার একটা বিশেষ দিক। বাংলা কবিতা নানান দিক থেকে সমৃদ্ধ হোক এটা একজন ব্যোজ্যেষ্ঠ কবি হিসাবে আমার একান্ত কামনা। কাজী জহিরুল ইসলামের কবিতা বাংলা কবিতার এই অভাব বা চাহিদা পূরণে আধুনিক বাংলা কবিতাকে নতুন মহিমা দিবে।

তিরিশের কবিতার প্রশ্রয় ও প্রভাব এখন আর বাংলা কবিতার অঙ্গে কোন চুমকি বসাতে পারছে না। কারণ জগৎ বদলে যাচ্ছে। এটা একজন চিরভ্রাম্যমান কবি যদি বুঝতে না পারেন তাহলে কে বুঝবে? আমি জহিরুল ইসলামকে তার সাথে আমার সর্বশেষ সাক্ষাতের সময় তা বলেছি। আমার মনে হয় তিনি এ ব্যাপারে সচেতন আছেন। মানুষের হৃদয় হলো সব সময় একটি আন্তর্জাতিক ব্যাপার। এই হৃদয়বৃত্তি নিয়ে একজন বিচরণশীল কবি কবিতায় কি তরঙ্গ তোলেন তা আমার খুব জানতে আগ্রহ হয়। আমার বিশ্বাস কাজী সাহেব আমাদের সেই আকাঙ্ক্ষা মেটবেন। কথা হলো বাংলা কবিতাকে আধুনিক করে তোলার দায়িত্ব খানিকটা হলেও কাজী জহিরুলের মতো ভ্রমণবিলাসী কবিদের ওপর বর্তায়।

যারা দেশের বাইরে থাকেন যেমন শহীদ কাদরী, কাজী জহিরুল ইসলাম ও হাসান আল-আব্দুল্লাহ। তাদের মধ্যে কাজী জহিরুল ইসলামের সম্ভাবনা ও সুযোগ সব চাইতে বেশী ও একটু বৈচিত্রপূর্ণ। কারণ তিনি জাতিসংঘের কর্মকর্তা হিসাবে একটি মূল্যবান পাসপোর্ট বহন করেন এবং একটি দায়িত্বপূর্ণ পদে অধিষ্ঠিত থাকেন। এতে তার সুযোগ ও সম্ভাবনা অনেক প্রসারিত হয়েছে। তার কবিতায় প্রবাসের অনেক বিচিত্র ঘটনা এসে উপমা উৎপেক্ষারূপে কবিতাকে সাহায্য করে। সবচেয়ে বড় কথা হলো কাজী জহিরুল ইসলাম আমার কালের আন্তর্জাতিক বিচরণশীল কবি হিসাবে সর্বাধিক সক্রিয় লেখক। তিনি কবিতাই লেখেন না, ভ্রমণবিলাসী মানুষ হিসাবে তার অভিজ্ঞতার পূর্ণ বিবরণ দিয়ে ভ্রমণকাহিনী রচনা করে চলেছেন। আমি অগ্রজ লেখক হিসেবে কাজী জহিরুল ইসলামের প্রতিটি লেখার মূল্যায়ন করতে আগ্রহী। আমার ধারণা কাজী জহিরুল এই সময়ের সবচেয়ে বিচরণশীল আধুনিক কবি। তার ওপর একটি বিস্তারিত আলোচনা একান্ত দরকার। আমার দ্বারা এই মুহূর্তে সেটা সম্ভবপর হচ্ছে না কিন্তু আমি আশা করি ঢাকা ও কলকাতার বাংলা কবিতার চর্চাকারীরা বিষয়টা বিবেচনা করে দেখবেন। তবে সাথে কুলালে আমি কাজী জহিরুল ইসলামের সাক্ষাতে তার বিষয়ে আরো জেনে নিয়ে একটা দীর্ঘ প্রবন্ধ রচনার ইচ্ছে আছে।

কাজী জহিরুল ইসলামকে জন্মদিনের শুভেচ্ছা জানানোর পাশাপাশি তার কবিতার বিশ্ববিকাশ কামনা করি ।